



Na osnovu člana 17. stav 1. i člana 44. stav 1. Zakona o Visokom sudskom i tužilačkom vijeću Bosne i Hercegovine („Službeni glasnik Bosne i Hercegovine”, br. 25/04, 93/05, 48/07, 15/08, 63/23, 9/24 i 50/24 – u daljem tekstu Zakon o VSTV BiH), a u vezi sa članom 61. i 62. Poslovnika Visokog sudskog i tužilačkog vijeća Bosne i Hercegovine („Službeni glasnik Bosne i Hercegovine“, br. 55/13, 96/13, 46/14, 61/14, 78/14, 27/15, 46/15, 93/16, 48/17, 88/17, 41/18, 64/18, 12/21, 26/21, 35/21, 68/21, 1/22, 26/23, 83/23, 9/24, 27/24 i 72/24), Visoko sudsko i tužilačko vijeće Bosne i Hercegovine (u daljem tekstu: Vijeće), u sastavu, sudija Halil Lagumdžija, predsjednik Vijeća, sutkinja Aleksandra Obradović i sutkinja Sanela Gorušanović - Butigan, potpredsjednice Vijeća, te tužilac Sanin Bogunić, tužiteljica Bojana Jolović, sutkinja Ljiljana Bošnjak - Glizijan, sudija mr. Srđan Forca, sudija Mustafa Šabić, advokat dr. sc. Davor Martinović, advokatica mr. Duška Bogojević, član Vijeća prof. dr. Džamna Vranić, tužiteljica Snježana Petković i tužiteljica Željka Fabić, na sjednici održanoj 15. i 16.01.2025. godine, donijelo je

## R J E Š E N J E

### o imenovanju sudije u Poseban odjel Vrhovnog suda Federacije Bosne i Hercegovine za korupciju, organizovani i međukantonalni kriminal

- I. Za sudiju Posebnog odjela Vrhovnog suda Federacije Bosne i Hercegovine za korupciju, organizovani i međukantonalni kriminal imenuje se **Igor Todorović**.
- II. Datum stupanja na dužnost imenovanog Vijeće će odrediti posebnom odlukom.

## O b r a z l o ž e n j e

Na osnovu člana 36. Zakona o VSTV-u BiH i člana 33. i 34. Poslovnika Visokog sudskog i tužilačkog vijeća Bosne i Hercegovine (u daljem tekstu: Poslovnik VSTV-a BiH), Vijeće je dana 04.11.2024. godine, na internet stranici Vijeća objavilo javni konkurs pod brojem: 04-07-3-3969-1/2024, kojim je oglašeno 10 (deset) pozicija sudije u Poseban odjel Vrhovnog suda Federacije Bosne i Hercegovine, sa iskustvom u radu na predmetima organizovanog kriminala i korupcije odnosno složenim krivičnim predmetima.

Nakon provedene konkursne procedure, nadležno podvijeće je u skladu sa članom 59b. st. (1), (3) i (4) Poslovnika VSTV-a BiH izvršilo finalno rangiranje kandidata, te je Vijeću dostavilo rang listu kandidata sa obrazloženim prijedlogom za postupanje.

Prije razmatranja rang liste kandidata, Vijeće je uzelo u obzir činjenicu da je kandidatkinja na rang listi pod rednim br. 2, nakon finalnog rangiranja kandidata, odustala od kandidature za navedenu sudijsku poziciju. Takođe, kandidati pod rednim brojem 7, 8, 11 i 13. predloženi su za druge pozicije u pravosuđu u okviru istog javnog konkursa.

Razmatrajući zaključenu rang listu kandidata i utvrđeni broj bodova, kao rezultat ocjenjivanja svih kriterija propisanih Zakonom o VSTV-u BiH i Poslovnikom VSTV-a BiH, Vijeće je odlučilo da od deset oglašanih pozicija imenuje sedam kandidata, i to kandidate na rang listi pod rednim brojem 1, 4, 6, 10, 12, 16 i 19: Igora Todorovića, Mersudina Pružana, Senada Osmića, Ajlu Papović-Mujan, Pavu Radoša, Enisu Adrović i Željka Rezu, dok je za tri pozicije sudije odlučeno da se konkurs ponovi iz razloga predviđenih članom 62c. stav (1) tačka a) Poslovnika VSTV-a BiH.

Dakle, Vijeće je odlučilo da za prvu od deset oglašanih pozicija sudije Vrhovnog suda Federacije BiH imenuje kandidata na rang listi pod rednim brojem 1 Todorović Igora, iz reda srpskog naroda, koji od 13.06.2016. godine obavlja dužnost sudije Kantonalnog suda u Sarajevu. Trenutno je raspoređen na krivični referat, predsjednik je krivičnog odjeljenja i zamjenik predsjednika suda.

Prethodno imenovanju na poziciju sudije navedenog suda, imenovani kandidat je u periodu od 2008. do 2016. godine bio sudija Općinskog suda u Sarajevu a u periodu od 2001. do 2006. godine sudija za prekršaje u Sudu za prekršaje Han Pijesak.

Vijeće je nakon ocjene stručne sposobnosti kandidata zasnovane na dosadašnjim rezultatima u karijeri, sposobnosti pravne analize, komunikativnosti i sposobnosti prezentacije, sposobnosti kandidata da odgovorno, nezavisno i nepristrasno obavlja funkciju sudije, uzimajući u obzir, između ostalog, dosadašnje radno iskustvo kandidata, profesionalnu nepristrasnost i ugled, ponašanje van posla, edukaciju i usavršavanje, objavljivanje stručnih i naučnih radova, te druge aktivnosti u struci i ocjene kriterija podobnosti, ocijenilo da imenovani kandidat u potpunosti ispunjava uslove za imenovanje propisane u članu 43. Zakona o VSTV-u BiH.

Kada je u pitanju broj ostvarenih bodova, Vijeće je imalo u vidu da je imenovani kandidat u toku konkursne procedure, u pogledu bodova za kriterij stručnosti i sposobnosti pravne analize ostvario ukupno 100 bodova od mogućih 100 bodova, dok je na razgovoru pred nadležnom komisijom Vijeća u pogledu drugih kriterija ostvario ukupno 17 bodova od mogućih 20 bodova, što ga je u konačnici rangiralo na prvom mjestu rang liste kandidata sa ukupno ostvarenih 117 bodova od mogućih 120 bodova.

Kriteriji stručnosti i sposobnosti pravne analize imenovanog kandidata utvrđeni su na osnovu ocjene rada za posljednje tri godine za koje je ocijenjen. Za prethodne tri godine odnosno 2021, 2022 i 2023. godinu ocijenjen je ocjenama 5,5,5, što čini prosjek ocjena 5. Prema odredbama člana 56. stav 2. Poslovnika VSTV-a BiH, prosječnoj ocjeni rada za prethodne tri godine dodijeljeno je 100 bodova.

Ostali kriteriji, koji se odnose na sposobnost kandidata da odgovorno, nezavisno i nepristrasno obavlja funkciju za koju se prijavio, profesionalne nepristrasnosti i ugleda, te ponašanja van posla, dosadašnjeg radnog iskustva kandidata, edukacije i usavršavanja, objavljivanja stručnih i naučnih radova, te drugih aktivnosti u struci i komunikativnosti utvrđeni su na razgovoru pred nadležnom komisijom Vijeća, kojom prilikom je svaki član komisije nezavisno bodovao kriterije, kako je to propisano u čl. 54., 54a., 54d., 54e. i 54f. Poslovnika VSTV-a BiH, pri čemu je kandidat po tom osnovu u konačnici ostvario ukupno 17 bodova. Konačan broj bodova koje kandidat ostvari na razgovoru predstavlja prosjek zbira ocjena po kriterijima koji se ocjenjuju na razgovoru.

Pored ukupnog broja ostvarenih bodova, na osnovu kojih je kandidat u skladu sa čl. 59a. stav (1) tačka c) i 59b. st. (3) i (4) Poslovnika VSTV-a BiH stekao uslove za predlaganje i imenovanje na poziciju sudije Vrhovnog suda, Vijeće je vodilo računa o okolnostima koje su relevantne za procjenu podobnosti kandidata iz člana 48a. ovog poslovnika, kao i o potrebi osiguranja adekvatne nacionalne i spolne zastupljenosti u navedenom sudu, u smislu člana 43. stav (2) Zakona o VSTV-u BiH.

Vijeće je prilikom imenovanja navedenog kandidata ocijenilo da ne postoje okolnosti koje izazivaju sumnju u pogledu podobnosti kandidata za poziciju za koju se prijavio.

Adekvatna nacionalna zastupljenost u konkretnom sudu utvrđena je na osnovu popisa stanovništva iz 1991. godine.

Nacionalna struktura 58 sudija, prema popisu stanovništva iz 1991. godine, bi trebala biti: Bošnjaci (30,3), Hrvati (12,8), Srbi (10,2), Ostali (4,7). Trenutna nacionalna struktura 44 sudija: Bošnjaci (28), Hrvati (4), Srbi (10), Ostali (2). Prema prethodno navedenoj nacionalnoj strukturi u Vrhovnom sudu

Federacije BiH nedostaje kandidata iz reda bošnjačkog naroda (- 2,3), hrvatskog naroda (- 8,8), srpskog naroda (- 0,2) i ostalih (- 2,7).

Dakle, uzimajući u obzir trenutnu nacionalnu strukturu u navedenom sudu, Vijeće je u konkretnom slučaju za prvu od deset oglašanih pozicija sudije imenovalo prvorangiranog kandidata, koji dolazi iz reda srpskog naroda.

Imajući u vidu potrebu za popunjavanjem pozicija u zakonom formiranom posebnom odjelu Vrhovnog suda Federacije BiH za rad na predmetima organizovanog kriminala i korupcije, koja je utvrđena u skladu sa članom 34. stav (1) tačka h), a u vezi člana 59b. stav (5) tačka e) Poslovnika VSTV-a BiH, Vijeće je prilikom imenovanja vodilo računa i o radnom iskustvu i rezultatima imenovanog kandidata na predmetima organizovanog kriminala i korupcije, te složenim krivičnim predmetima.

Radi utvrđivanja navedenih okolnosti, radnog iskustva i rezultata kandidata na predmetima organizovanog kriminala i korupcije, te složenim krivičnim predmetima, za kandidate su pribavljena mišljenja u skladu sa članom 59c. Poslovnika VSTV-a BiH. Navedene okolnosti su dodatno utvrđene na osnovu informacija pribavljenih na razgovoru sa kandidatom, u skladu sa članom 53. stav (11) Poslovnika VSTV-a BiH, te uvidom u službene evidencije Vijeća.

U mišljenju Predsjednice Vrhovnog suda Federacije BiH, navodi se da sudija Igor Todorović posjeduje iskustvo i rezultate na predmetima organiziranog kriminala i korupcije, kao i složenim krivičnim predmetima, posebno sa predmetima za koje je vladao veliki interes javnosti.

Predsjednica Vrhovnog suda FBiH između ostalog navodi, da je sudija svojim dosadašnjim radom pokazao da nije podložan pritiscima bilo koje vrste i odluke donosi objektivno i nepristrasno u skladu sa svojim sudijskim ubjeđenjem. Sa kolegama sudijama, predsjednikom suda i ostalim zaposlenicima suda ima profesionalan i korektan odnos. Kao predsjednik krivičnog odjeljenja ovog suda već 4 godine sve probleme unutar odjeljenja uspješno rješava dijalogom i dogovorom sa ostalim sudijama unutar odjeljenja. U svom radu na svim predmetima pridržava se zakonom propisanih rokova. Uspješno je obavljao funkciju vršioca dužnosti predsjednika suda u trajanju od osam mjeseci, te je tim pokazao da posjeduje izuzetne rukovodne sposobnosti. Trenutno pored sudijske funkcije obavlja i funkciju zamjenika predsjednika suda i predsjednika krivičnog odjeljenja.

Na osnovu navedenih mišljenja, informacija pribavljenih na razgovoru, te uvidom u službene evidencije Vijeća, zaključuje se da imenovani kandidat ima potrebna stručna znanja, iskustvo i rezultate na predmetima organizovanog kriminala i korupcije, te složenim krivičnim predmetima.

Uzimajući u obzir navedeno, Vijeće je kumulativno vodeći računa o svim okolnostima iz člana 59b. stav (5) tač. a), b), c) i e) i stav (7) Poslovnika VSTV-a BiH, ocijenilo da je imenovani kandidat u potpunosti ispunio zakonom propisane uslove, kao i druge kriterije koji se cijene prilikom izbora kandidata, kako bi bio imenovan na poziciju sudije u Vrhovni sud Federacije BiH.

Shodno odredbama člana 44. stav (6) Zakona o VSTV-u BiH, u slučaju pokretanja upravnog spora za ovu poziciju se odgađa stupanje na funkciju novoimenovanog sudije, dok se ne okonča sudski postupak.

U skladu sa odredbama člana 2. Zakona o izmjeni Zakona o Visokom sudskom i tužilačkom vijeću Bosne i Hercegovine („Službeni glasnik BiH“ br. 50/24) sva lica imenovana u periodu od 23. marta 2024. do 28. februara 2025. mogu stupiti na dužnost, a provjera njihovih izvještaja o imovini i interesima bit će izvršena nakon uspostavljanja Odjela za provođenje postupka po izvještajima. Ako ishod provjere bude negativan, bit će pokrenut disciplinski postupak u skladu sa pravilima iz člana 86d. st. (3), (4) i (5).


Ovo rješenje će biti objavljeno na internet stranici Vijeća, shodno članu 44. stav (1) Zakona i članu 62. stav (4) Poslovnika VSTV-a BiH, uz naznaku datuma objave od kojeg počinje teći rok za podnošenje tužbe.

Imajući u vidu sve iznesene razloge, Vijeće je odlučilo kao u izreci ovog rješenja.

**Pouka o pravnom lijeku:** Protiv ovog rješenja može se pokrenuti upravni spor pred Sudom Bosne i Hercegovine u roku od osam dana od dana objavljivanja rješenja o imenovanju na internet stranici Vijeća.

Broj: 04-07-3-416-1/2025

Datum: 16.01.2025. godine



Predsjednik VSTV-a BiH

Haki Lagumdžija